

## REGIONAL NEWS

UNIT

ALL INDIA RADIO, AGARTALA

Date:21-03-2024

Time: 07.35-07.40 AM Hrs

BENGALI MORNING BULLETIN

**Election-Notifcation :**

নির্বাচন কমিশন, অষ্টাদশ লোকসভা নির্বাচনে প্রথম দফার ভোটগ্রহণের জন্য গতকাল বিজ্ঞপ্তি জারি করেছে। লোকসভার মোট পাঁচশ তেতাল্লিশটি আসনের মধ্যে প্রথম দফায় আগামী ১৯শে এপ্রিল একুশটি রাজ্য ও কেন্দ্রশাসিত অঞ্চলের ১০২টি আসনে ভোট গ্রহণ করা হবে। এরমধ্যে অরুণাচল প্রদেশে দুটি, আসামে পাঁচটি, বিহারে চারটি, মধ্যপ্রদেশে ছয়টি, মহারাষ্ট্রে পাঁচটি, মনিপুর ও মেঘালয় দুটি করে আসনে ভোট গ্রহণ করা হবে। তাছাড়া রাজস্থানে বারটি, তামিলনাড়ুতে ৩৯টি, উত্তরপ্রদেশে আটটি, উত্তরাখণ্ডে পাঁচটি, পশ্চিমবঙ্গের তিনটি, দাদরা নগর হাভেলি দমন দিও তে দুইটি এবং দিল্লিতে সাতটি আসনে ভোট গ্রহণ করা হবে। প্রথম দফায় একটি করে আসনে ভোটগ্রহণ করা হবে ত্রিপুরা, ছত্রিশগড়, মিজোরাম, নাগাল্যান্ড, সিকিম, আন্দামান নিকোবর, চন্ডিগড়, লাদাখ, লাক্ষাদ্বীপ ও পুদুচেরিতে।

\*\*\*\*\*

**Election-Tripura :**

নির্বাচন কমিশন, পশ্চিম ত্রিপুরা লোকসভা আসন ও রামনগর বিধানসভা কেন্দ্রের উপনির্বাচনের জন্য গতকাল বিজ্ঞপ্তি জারি করেছে। বিজ্ঞপ্তি জারির পর থেকেই মনোনয়নপত্র গ্রহণের

কাজ শুরু হয়েছে। মনোনয়নপত্র জমা দেবার শেষ তারিখ আগামী ২৭শে মার্চ। স্কুটিনি ২৮শে মার্চ। মনোনয়ন পত্র প্রত্যাহারের শেষ দিন ৩০শে মার্চ। ভোট গ্রহণ ১৯শে এপ্রিল। পশ্চিম ত্রিপুরা লোকসভা আসনের রিটার্নিং অফিসার ড: বিশাল কুমার আকাশবাণীকে জানিয়েছেন, মনোনয়নপত্র গ্রহণের প্রথম দিনে মিলনপদ মুড়াসিং নামে এক নির্দল প্রার্থী মনোনয়নপত্র জমা দিয়েছেন।

\*\*\*\*\*

#### **EC-POSTAL BALLOT :**

ভোট কর্মী, নিরাপত্তা কর্মী এবং ভোটের কাজে নিযুক্ত অন্যান্য কর্মীদের পাশাপাশি আরো কিছু জরুরী পরিষেবার সঙ্গে যুক্ত ভোটারগণ আসন্ন লোকসভা নির্বাচনে পোস্টাল ব্যালটে ভোট দিতে পারবেন। নির্বাচন কমিশন থেকে এ বিষয়ে নতুন নির্দেশিকা জারি করা হয়েছে। এই নির্দেশিকা অনুযায়ী ত্রিপুরায় পোস্টাল ব্যালটে ভোটদানের জন্য কিছু অত্যাৱশ্যকীয় বা জরুরী পরিষেবার সঙ্গে যুক্ত কর্মীদেরও অন্তর্ভুক্ত করা হয়েছে। এই পরিষেবা গুলির মধ্যে রয়েছে বিদ্যুৎ, কারা, স্বাস্থ্য, অগ্নি নির্বাপক, বিএসএনএল, রেল ও ডাক পরিষেবা। তাছাড়া আকাশবাণী, দূরদর্শন এবং নির্বাচন কমিশনের স্বীকৃত পরিচয়পত্র নিয়ে ভোটগ্রহণের দিন সংবাদ সংগ্রহের কাজে যে সমস্ত সংবাদ কর্মী ব্যস্ত থাকবেন তারাও আসন্ন নির্বাচনে পোস্টাল ব্যালটে ভোট দেবার সুযোগ পাবেন।

\*\*\*\*\*

Election campaign of BJP:

সিপাহীজলা জেলার বিশালগড় কমলাসাগর বিধানসভা কেন্দ্রের ফুলতলী বাজার এলাকায় গতকাল বি.জে.পির নির্বাচনী সভা হয়। পশ্চিম ত্রিপুরা লোকসভা আসনের বি.জে.পি প্রার্থী বিপ্লব কুমার দেবের সমর্থনে সভায় প্রধান বক্তা হিসেবে উপস্থিত ছিলেন দলের রাজ্য সভাপতি রাজীব ভট্টাচার্য। সভায় অন্যদের মধ্যে উপস্থিত ছিলেন বি.জে.পির কমলাসাগর মন্ডল সভাপতি সুবীর চৌধুরী, সিপাহীজলা জিলা পরিষদের সভাপতি সুপ্রিয়া দাস দত্ত , বিধায়ক অন্তরা সরকার দেব প্রমুখ। চড়িলাম বিধানসভা কেন্দ্রের বিশ্রামগঞ্জ মোটর স্ট্যাভেও গতকাল বি.জে.পির নির্বাচনী সভা হয়।

\*\*\*\*\*

DM, SP flag march :

পশ্চিম আসনের নির্বাচনী আধিকারিক তথা জেলা শাসক ডঃ বিশাল কুমার এবং পশ্চিম জেলার পুলিশ সুপার কিরন কুমার কে গতকাল রাতে যৌথভাবে আগরতলায় কেন্দ্রীয় আধা সামরিক বাহিনীর জওয়ানদের নিয়ে শহরের বিভিন্ন রাস্তায় ফ্ল্যাগ মার্চ করেন । পরে ডঃ বিশাল কুমার জানান, আসন্ন লোকসভা ভোটে কোনওধরনের হিংসা বরদাস্ত করা হবে না। নাগরিকদের নিরপত্তায় যথেষ্ট নিরাপত্তারক্ষী মোতায়েন করা হয়েছে। কেন্দ্রীয় আধা সামরিক বাহিনী, পুলিশ এবং টিএসআর যৌথভাবে ভোট পর্যন্ত প্রতি দিন পশ্চিম জেলার বিভিন্ন জায়গায় ফ্ল্যাগ মার্চ করবেন বলে জেলা শাসক জানিয়েছেন।

\*\*\*\*\*

কবিতা দিবস:

আজ বিশ্ব কবিতা দিবস । এবছর এই উৎসবের পচিশতম উদযাপন । সারাদেশের সঙ্গে রাজ্যে বিভিন্ন কবিতা সংগঠন, সংস্থা দিনটি পালনের উদ্যোগ নিয়েছে। আগরতলায় আজ মূল অনুষ্ঠানটি হবে আগরতলা প্রেস ক্লাবে। এই অনুষ্ঠানে দেশের বিভিন্ন জায়গায় কবিরা অংশ গ্রহণ করবেন । বাংলাদেশ থেকেও এই উপলক্ষে কবিরা রাজ্যে আসছেন। এদিকে আজ বিশ্ব পুতুল দিবস। এবছর জলবায়ু সংরক্ষণ ভাবনায় দিনটি উদযাপিত হচ্ছে । ত্রিপুরা পাপেট থিয়েটার বিভিন্ন কর্মসূচী হাতে নিয়েছে।

\*\*\*\*\*

**Detain of ganja :**

আগরতলা রেল ষ্টেশনে গাঁজা সমেত ধরা পড়েছে ছয় যুবক। আগরতলা জিআরপি থানার পুলিশ জানিয়েছে, গতকাল সন্ধ্যায় রেল ষ্টেশনে আসার পরই সন্দেহভাজন ছয়জনকে আটক করা হয়। তাদের ব্যাগে তল্লাশি করে ৪৮ কিলো গাঁজা পাওয়া গেছে। ধৃতদের আজ আদালতে হাজির করা হবে বলে জানান জিআরপি থানার ওসি।

\*\*\*\*\*

**Northeast Games :**

নাগাল্যান্ডে আয়োজিত তৃতীয় উত্তরপূর্ব গেমসে ত্রিপুরা তৃতীয় দিনে গতকাল মার্শাল আর্ট ইভেন পেনচাক সিলাটে চারটি পদক পেয়েছে। এর মধ্যে রৌপ্য পদক পান সোনি দত্ত ও প্রিয়া দেবনাথ। ব্রোঞ্জ পদক পেয়েছেন লক্ষী রাম চাকমা ও করণদ্বীপ উরান । সবমিলিয়ে এপর্যন্ত রাজ্যদল সাতটি পদক পেলো। গতকাল এথলেটিক্সে মহিলাদের ৪ গুন ১০০ মিটার রীলে দৌড়ে ফতেমা

বেগম, দীপশিখা সূত্রধর, ঝর্ণাবালা দেবনাথ ও যশমিন আক্তার  
রৌপ্য পদক পান। এছাড়া ফুটবলের পুরুষ বিভাগে মেঘালয় ২-১  
গোলে ত্রিপুরাকে হারিয়ে দেয়। ভলিবলের পুরুষ বিভাগে রাজ্যদল  
মণিপুর ও মিজোরামের কাছে সরাসরি ৩-০ সেটে পরাজিত হয়।

\*\*\*\*\*

**Weather :**

আজ আকাশ সাধারণত মেঘাচ্ছন্ন থাকবে। কিছু কিছু জায়গায়  
হালকা বৃষ্টিপাতের সম্ভাবনা রয়েছে। তাপমাত্রা সর্বোচ্চ ত্রিশ ডিগ্রী  
এবং সর্বনিম্ন উনিশ ডিগ্রী সেলসিয়াস এর কাছাকাছি থাকবে।  
আজ ভোরের সর্বনিম্ন তাপমাত্রা ছিল ১৯.৩ ডিগ্রী সেলসিয়াস।  
আগামী চব্বিশ ঘণ্টায় রাজ্যের সব জেলায় বিক্ষিপ্ত ভাবে বজ্র  
বিদ্যুত সহ হালকা থেকে মাঝারি পর্যায়ে বৃষ্টিপাতের সতর্কতা  
জারি করেছে আবহাওয়া দপ্তর।

\*\*\*\*\*

\*\*\*\*\*



